



Moguća obustava s tečaja?

Službenici **SIPA**, po naredbi Tužilaštva KS-a, vršili su provjere u privrednom društvu Hidrogradnja, dok se Sindikat sprema za poništenje stečaja

Piše: **EDIN BARIMAC**

Radnici Hidrogradnje, nekadašnjeg giganta građevinske industrije, zatražit će opoziv stečajnog postupka u Hidrogradnji, kazao nam je predsjednik Sindikata preduzeća Redžep Tufekčić.

- U Općinskom sudu će 16. februara biti održana izvještajno ročište. Na tom trećem izvještajnom ročištu ćemo zatražiti od stečajnog sudije Hakije Zaimovića da se stečaj u Hidrogradnji obustavi, jer je sačinjen na neustavnom zakonu, kaže Tufekčić.

Sastanak s Dunovićem

On je podsjetio da je u devetom mjesecu prošle godine 600 radnika Hidrogradnje dobilo otkaz.

- Nisu dobili nijedan fening ni minimalnu platu, otpremninu. Samos dobili papir da idu na biro. Radnici su ostali oštećeni za 37 plata, za 13 godina neuvezanog radnog staža, a većinski vlasnik Vlada Federacije BiH (67 posto) je napravila akumulirani gubitak od 100 miliona maraka. I oni su predmet tužbe u Općinskom sudu koju je podnio Sindikat Hidrogradnje. Vlada je projektovano srušila Hidrogradnju, uvukla je u stečaj samo zato što nije radila u skladu sa zakonom i iz tog razloga je stečaj nezakonit. Zato je

naš prijedlog tužbe da Vlada FBiH obešteti Hidrogradnju, fondove, porezne uprave, plate radnika u akumuliranom gubitku od 100 miliona maraka prodajom državnih obveznica, jer ona je jedini krivac za stečaj Hidrogradnje. Pozivam sve radnike Hidrogradnje da dođu na ročište i da glasaju za pokretanje postupka opoziva stečaja u Hidrogradnji i da se namiri sva šteta, kazao je Tufekčić.

Najavio je da će u narednim danima održati i sastanak sa potpredsjednikom Federacije BiH Milanom Dunovićem. Dunović je za Oslobođenje potvrdio da će se sastati sa radnicima bivšeg građevinskog giganta.

- Ono što je bila moja nadležnost je zapravo zahtjev za ocjenu ustavnosti Zakona o stečaju. Ta priča je zatvorena na način da je Zakon proglašen neustavnim. Sva dalja eventualna borba svakog radnika, u svakom pojedinom preduzeću, nešto je što je pravna borba za koju su radnici nadležni, kazao je Dunović.

Podsjetimo, pripadnici Državne agencije za istrage i zaštitu (**SIPA**) prošle sedmice su ušli u prostorije preduzeća Hidrogradnja, ukojem su se zadržali nekoliko sati, a po prijavi Sindikata Hidrogradnje u vezi s kriminalom i korupcijom, te akumuliranim gubitkom od 100 miliona KM.

Iz **SIPA** su nam kazali da su po-

licijski službenici ove agencije u prethodnom periodu postupali po naredbi Kantonalnog tužilaštva Sarajevo, koja se odnosi na vršenje određenih provjera u privrednom društvu Hidrogradnja d.d. Sarajevo.

Izvještajno ročište

- Po okončanju provjera sačiniti će se odgovarajući izvještaj koji će biti dostavljen nadležnom tužilaštvu, kazali su iz **SIPA**.

Zijad Fazlagić, stečajni upravnik Hidrogradnje, za Oslobođenje je potvrdio da su inspektori **SIPA** boravili u Butmiru, u podružnici SIGMA, ali da nisu izuzeli nikakvu dokumentaciju.

- Razgovarali smo o prethodnih 20-25 godina poslovanja Hidrogradnje. To je uobičajeno kad se otvori stečajni postupak, da određene agencije opserviraju stečajnog dužnika, zbog čega je nastao stečaj..., kazao je Fazlagić.

Osvrnuo se i na izvještajno ročište koje će biti održano u četvrtak.

- Na njemu će se priznavati dugovi koje stečajni dužnik ima prema povjericima, pojasnio je Fazlagić.

Na pitanje o kolikim dugovima je riječ, odgovorio je: "Nismo još obradili ni polovinu zahtjeva za potraživanja od Hidrogradnje, stoga ne možemo tačno tvrditi koji je to iznos."



Po okončanju provjera **SIPA** će sačiniti izvještaj za Tužilaštvo



Tufekčić: Radnici su ostali oštećeni